

## ЭРДЭНЭ РЕСУРС 2022 ОНЫ ГУРАВДУГААР УЛИРЛЫН ТАЙЛАН, ХӨНДИЙ АЛТНЫ ДҮҮРГИЙН ШИНЭ МЭДЭЭЛЛИЙГ ТАНИЛЦУУЛЛАА

Хэвлэлийн мэдээ  
Нова Скошиа муж, Халифакс хот  
2022.11.03

**Эрдэнэ Ресурс Девелопмент Корпораци (TSX: ERD | MSE: ERDN) (“Эрдэнэ Ресурс” эсвэл “Компани”)** нь 2022 оны 9 сарын 30-нд дуусгавар болсон гурав болон есөн сарын санхүүгийн болон үйл ажиллагааны тайлан, Хөндий Алтны Дүүрэг ба Баян Хөндий Алтны Төслийн (“Баян Хөндий” эсвэл “БХ”) хөгжүүлэлтийн мэдээллийг хүргэж байна. SEDAR болон компанийн вебсайт дээр байршуулсан 2022 оны гуравдугаар улирлын санхүүгийн тайлан, үйл ажиллагааны тайлан (“MD&A” буюу “Удирдлагын хэлэлцүүлэг ба дүн шинжилгээ”) нь энэхүү хэвлэлийн мэдээний салшгүй нэг хэсэг болно.

### Тодруулга:

Эрдэнэ Ресурсийн ерөнхийлөгч, гүйцэтгэх захирал Петер Акерли хэлэхдээ: “Гуравдугаар улиралд бид Хөндий Алтны Дүүргийн нөөцийг нэмэгдүүлэх болон Баян Хөндий алтны төслийг хөгжүүлэлтийн шат руу ахиулах зорилтын дагуу амжилттай ажилласан. Эрдэнэ Ресурсийн өрөмдлөгийн үр дүнгээр Баян Хөндийн ашиглалтын эхний үе шатанд олборлох бүсийн өндөр агуулга бүхий хүдэржилтийг бататгаж, зарим хэсгүүдэд тэлсэн. Мөн өнгөрсөн гурван сарын хугацаанд Хөндий Алтны Дүүргийн нөөцийг нэмэгдүүлэх боломжтой хэд хэдэн шинэ бүсэд хайгуулын өрөмдлөг гүйцэтгэлээ.”

“Үүнтэй зэрэгцэн, Баян Хөндий төслийн бүтээн байгуулалтын бэлтгэл ажлууд өрнөсөөр байна. Төслийн талбайн бэлтгэл ажлуудыг гүйцэтгэн, дийлэнх байгууламжийн тусгай зөвшөөрлийг хүлээн авсан төдийгүй Монгол Улс, БНХАУ-ын хил гааль дээр үүсээд байсан нэвтрэлтийн хүндрэлүүд шийдэгдэх хандлагатай байна. Өмнө танилцуулсан нарийвчилсан ТЭЗҮ-тэй харьцуулбал жилд олборлох дундаж алтны хэмжээг 15-25% өсгөх боломжтой гравитацийн аргаар боловсруулах судалгааг гүйцэтгэж байгаа бөгөөд шинээр нээн илрүүлсэн Хар Морь, Улаан талбайн үр дүнгүүдэд тулгуурлан Баян Хөндийн боловсруулах үйлдвэрийн загварчлал, инженерчлэлийг оновчлох ажлуудыг давхар гүйцэтгэж байна. Бид дээрх ажлуудтай холбоотой мэдээллийг тухай бүрт танилцуулах болно.”

### 2022 оны 3-р улирлын онцлох үйл явдлууд:

#### Баян Хөндий Алтны төсөл – 100% Эрдэнэ Ресурсийн эзэмшил

- Баян Хөндий Алтны Төслийн бүтээн байгуулалтын бэлтгэл ажлуудыг үргэлжлүүлж байна:

- Кемпийн өргөтгөл, харилцаа холбооны дэд бүтцийг шинэчлэх, төслийн хяналтын программ хангамж зэрэг урьдчилсан ажлуудыг хийж дуусгасан.
- Томоохон тоног төхөөрөмжийн нийлүүлэлт болон бүтээн байгуулалтын ажлын шинэчилсэн үнийн саналыг хүлээн авсан.
- Уурхайн төлөвлөлт, гравитацийн аргаар баяжуулах технологи болон алт боловсруулахад чиглэсэн тооцоолол судалгааг эхлүүлсэн.
- Эрсдэлийг тодорхойлох хөтөлбөрийг өргөжүүлж, олон нийтийн оролцоотой байгаль орчны хяналтыг эхлүүлсэн.
- Уурхайн хөгжүүлэлтийг эхлүүлэхэд шаардлагатай захиргааны байгууллагуудын зөвшөөрлүүдийг авсан:
  - Баяжуулах үйлдвэр болон хаягдлын нэгдсэн байгууламж ("IWF")-ийн нарийвчилсан загварчлалын зөвшөөрлийг авсан
    - Хаягдлын нэгдсэн байгууламж нь уурхайн хаягдал чулуулгийн дотор хуурай хаягдлыг байршуулснаар байгаль орчны эрсдэлийг бууруулж, газрын эвдрэлийг багасгах Монгол Улсын анхны байгууламж болох юм.
  - Төслийн 11 томоохон байгууламжийн барилгын зөвшөөрөл, эдгээрээс 8 байгууламжийн барилгын зөвшөөрлийг авсан.
- Орон нутгийг дэмжих хөтөлбөрүүд үргэлжилж байна:
  - Аймаг, сумдын засаг захиргааны байгууллагуудтай орон нутгийн хамтын ажиллагааны гэрээг шинэчлэн байгуулж, орон нутгийн хөгжлийг ил тод дэмжих суурь нөхцлийг бүрдүүлэв.
  - Монгол Улсын Ерөнхийлөгчийн санаачилсан “Тэрбум мод” үндэсний хөтөлбөрийг дэмжин нэг сая мод тарих амлалтын хүрээнд 10,000 гаруй мод тарьж суулгасан.
  - Орон нутгийн 100 гаруй иргэдийг сургалтад хамруулснаас 2022 онд 30 иргэнийг ажлын байраар хангасан.

### **Хайгуулын хөтөлбөр**

- 3-р улиралд Баян хөндий, Хар морь, Улаан талбайд 4,200 орчим метрийн өрөмдлөгийн хөтөлбөр гүйцэтгэсэн.
  - Баян Хөндийн өрөмдлөгийн үр дүнд төлөвлөж буй анхдагч уурхайн бүсэд өндөр агуулгатай, газрын дөт гүнд хүдэржилт илрүүлсэн.
  - Хар Морь болон Улаан талбайн өрөмдлөгийн үр дүнгүүд хүлээгдэж байгаа бөгөөд 4-р улирлын дундуур танилцуулна.
- Баян Хөндийн анхдагч уурхайн бүсэд өндөр агуулга бүхий олон интервалууд огтолсон:
  - Өрөмдлөгийн үр дүн нь Баян Хөндийн анхдагч уурхайн хэсэгт өндөр агуулгатай бүс үргэлжилж байгааг баталсан

- 29.6 г/т алтны агуулга бүхий 4 метрийн интервал багтаасан 8 г/т алтны дундаж агуулга бүхий 16 метр (BKD-358)
- 68.0 г/т алтны агуулга бүхий 2 метрийн интервал багтаасан 14.4 г/т алтны дундаж агуулга бүхий 10 метр (BKD-361)
- 32.6 г/т алтны агуулга бүхий 2 метр интервал багтаасан 10.4 г/т алтны дундаж агуулга бүхий 20 метр (BKD-369)
- 67.5 г/т алтны агуулга бүхий 1 метр интервал багтаасан 11.8 г/т алтны дундаж агуулга бүхий 7 метр. (BKD-354)
- 39.6 г/т алтны агуулга бүхий 1 метрийн интервал багтаасан 5.7 г/т алтны дундаж агуулга бүхий 10 метр огтоллоо. (BKD-356)
- Мөн эдгээр өндөр агуулгатай бүсээс гравитацийн аргаар боловсруулах туршилтын ажилд зориулж хүдрийн дээж цуглуулсан.
- Хөндий Алтны Дүүргийн нөөцийг шинэчлэхээр RPM Global компанитай хамтран ажиллаж байна.
  - Баян Хөндий, Алтан Нар, Улаан, Хар Морь талбайгаас 2 сая унц алттай тэнцэх нөөцийг тооцоолох зорилт тавьсан.

### Компанийн тухай

- 7 сарын 21-нд Эрик Спротт 2 сая долларын хөрөнгө оруулалт хийж, нийт 7.2 сая долларын санхүүжилтийг татан төвлөрүүлсэн.
  - Энэхүү санхүүжилтийг Компанийн Улаан болон Хар Морь талбайд хайгуулын өрөмдлөг гүйцэтгэх, Баян Хөндий алтны төслийн бүтээн байгуулалтын бэлтгэл ажил, хөгжүүлэлт ба эргэлтийн хөрөнгөд зарцуулж байна.
- Канадын Экспорт Хөгжлийн Агентлаг болон дотоодын санхүүжүүлэгч байгууллагуудтай Баян Хөндий Алтны Төслийн санхүүжилттэй холбоотой нарийвчилсан судалгааг гүйцэтгэж байна.
  - Канадын Экспорт Хөгжлийн Агентлагийн зээлийн нөхцлүүд дээр тохиролцоонд хүрсэн. 2023 оны эхэнд олборлолтын төлөвлөгөө болон хуваарь, төсвийг эцэслэн тохиролцохоор хүлээгдэж байна.
  - Дээрх үйл ажиллагаатай зэрэгцэн нэмэлт зээлийн судалгааг олон улсын болон Монголын санхүүгийн байгууллагууд гүйцэтгэж байна.
- 2022 оны 9 сарын 30-ны өдөр дуусгавар болсон есөн сарын хугацаанд компанийн нийт алдагдал \$4,909,342 байсан ба 2021 оны мөн үед \$3,831,404 байв.
  - Капиталжуулсан зардал болох \$6,555,922 оролцуулсан хайгуул болон үнэлгээний өртөг нь 2022 оны 9 сарын 30-ны байдлаар \$9,704,879 байсан нь 2021 оны мөн үеийн капиталжуулсан зардал \$6,871,310-ийг оролцуулсан \$9,120,054-тай харьцуулахад өссөн үзүүлэлт юм. Бүтээн байгуулалтын өмнөх үйл ажиллагаа эрчимжсэнтэй холбоотойгоор цалин урамшуулал, кемп болон оролцогч талуудтай харилцах зардал нэмэгдсэн ба тухайн

хугацаанд хайгуул багассантай холбоотой өрөмдлөг, судалгааны зардлууд, бэлэн бус хувьцаанд суурилсан урамшууллын зардал багассан.

- Компанийн ерөнхий ба захиргааны зардал нь 2022 оны 9 сарын 30-ны байдлаар \$1,791,332 байсан нь 2021 оны мөн үеийн \$1,594,223 -тай харьцуулахад өссөн үзүүлэлт байв. Хувьцаанд суурилсан урамшуулал, хөрөнгө оруулагчидтай харилцах, маркетингийн зардал багассан ч захиргааны цалин урамшуулал, мэргэжлийн үйлчилгээний өртөг, Баян Хөндий алтны төслийн бүтээн байгуулалтын бэлтгэл ажлын хүрээнд томилолтын зардал, төслийн санхүүжилт, мөн компанийн зах зээлийн үнэлгээний өсөлтөөр зохицуулалтын хураамжийн зардал өссөнтэй холбоотой.

### Мэргэшсэн этгээд (геологич)

Петер Далтон (Peter Dalton) нь Компанийн ахлах геологич бөгөөд NI 43-101-т заасан мэргэшсэн этгээд ба хэвлэлийн мэдээг Эрдэнэ Ресурсийн зүгээс хянан баталгаажуулсан болно.

### Компанийн тухай

Эрдэнэ Ресурс Девелопмент Корпораци нь Монгол Улсад суурь болон үнэт металлын хайгуул, төсөл хөгжүүлэлтийн үйл ажиллагаа эрхэлдэг Канад Улсад бүртгэлтэй хайгуулын компани. Компани нь Монгол Улсын баруун урд бүсэд 1 хайгуулын, 3 ашиглалтын тусгай зөвшөөрлийг эзэмшдэг бөгөөд эдгээр хайгуулын бүсэд хийсэн судалгааны үр дүнд Хөндий Алтны Дүүргийг нээн илрүүлсэн. Эрдэнэ Ресурс Девелопмент Корпораци нь Торонто болон Монголын хөрөнгийн биржүүд дээр бүртгэлтэй. Компанийн тухай дэлгэрэнгүй мэдээлэлтэй Компанийн вебсайт [www.erdene.com](http://www.erdene.com)-оос танилцах боломжтой. Компанийн талаарх чухал мэдээллүүд нь зөвхөн Компанийн вебсайтаар дамжин хүрдэг тул хөрөнгө оруулагчид вебсайтаар дамжуулан бодит мэдээлэл авахыг зөвлөж байна.

### Урьдчилсан таамаглал

Зарим мэдээллүүд нь Үнэт цаасны хуулийн хүрээнд урьдчилсан таамаглалуудыг агуулсан болохыг үүгээр мэдэгдэж байна. Урьдчилсан таамаглал нь урьд болж байсан болон ирээдүйд болох бодит баримт биш ба зөвхөн ирээдүйн төлөвлөгөө, стратеги, төсөл, нөхцөл байдалд тулгуурласан үзэл баримтлал, магадлал болон таамаглал болно. Энэхүү таамаглалууд нь тодорхой үндэслэлд тулгуурласан боловч баталгаа биш юм. Компанийн үйл ажиллагаа нь олон хүчин зүйлээс шалтгаалах бөгөөд зарим хүчин зүйлс нь Компанийн хяналтаас давсан байх магадлалтай ирээдүйд учирч болох хүчин зүйлс юм. Материаллаг өөрчлөлт үзүүлэх боломжтой хүчин зүйлсэд эрдсийн зах зээлийн үнэ, хайгуулын үр дүнгүүд, бизнесийн болон зах зээлийн орчин, эдийн засгийн байдал болон санхүүжилт, хөрөнгө босголт зэрэг орно. Дээр дурдсан мэдээллүүд нь ирээдүйд өөрчлөгдөн хувирах магадлалтай. Компани нь Үнэт цаасны хуульд өөрөөр заагаагүй тохиолдолд Урьдчилсан таамаглалыг өөрчлөн, шинэчлэх үүрэг хүлээхгүй.

*Орчуулга: Энэхүү хэвлэлийн мэдээ нь англи хэл дээр бэлтгэгдсэн хэвлэлийн мэдээний орчуулга болно. Англи, монгол хувилбаруудын хооронд зөрүү эсвэл зөрчилдөх зүйл гарвал англи хэл дээрх хувийг мөрдөнө.*

**ЭНЭХҮҮ МЭДЭЭЛЛИЙГ ОЛОН НИЙТЭД ТАНИЛЦУУЛАХАД ЯМАРВАА НЭГЭН ЗАСАГ ЗАХИРГААНЫ БАЙГУУЛЛАГА ЗӨВШӨӨРСӨН, ҮЛ ЗӨВШӨӨРСӨН МЭДЭГДЭЛ ХИЙГЭЭГҮЙ.**

Холбоо барих:

Петер К. Акерли, Ерөнхийлөгч болон гүйцэтгэх захирал  
Роберт Женкинс, Санхүү хариуцсан захирал

Утас: (902) 423-6419

И-мэйл: [info@erdene.com](mailto:info@erdene.com)

Twitter: <https://twitter.com/ErdeneRes>

Facebook: <https://www.facebook.com/ErdeneResource>

LinkedIn: <https://www.linkedin.com/company/erdene-resource-development-corp-/>